

2. Pasion Kammal I Cih Banghiam?

- a) **Laisiangtho bulphuhte** Jn. 1:1-3, 14 Lk. 8:4-15 Isa. 55: 8-11
 James 1:22-28 Heb. 4:12-13 Psa. 119:105
 Eph. 5:25-27

b) Thupatna

Pasion kammal pen leitungah a khauh pen vangliatna hi. Pasion in a kammal a pusuahsak peuhpeuh ciangin nate piang hi (Isa. 55:10-11). Na khatpeuh sem ding in Pasion in a gen teh, tua pen kizo ding hi. A kammal lawhsam ngeilo hi. Laisiangtho sung khempeuh ah Pasion kammal vangliatna in na a sep na mu thei hihang. Hun kipat pan a bei dongah mihingte nuntakna leh a tuah khak thute ading Pasion in a ngimnate a kammal tungtawn in semkhia hi.

c) Piansakna a Pasion kammal

Pasion in a kammal tawh vantung leh leitung piangsak hi (Gen. 1: Psa. 33:6-9; Heb. 11:3). Piansakna ah Pasion a pau ciang in a kammal vangliatna tungtawn in bangmah lo pan nate amah in piangsak hi. Hih piansak nasepna pen Topa Zeisu Khazih vangliatna tungtawn in kistem hi (Heb. 1:2-3). Pasion pen a piangsakpa hi in, na khempeuh piangsak bek hilo in, ama kammal vangliatna tawh tua nate keem in len paisuak hi. Hi hi tuni in zong Pasion in a thak nate bawl thei ding a i upna leh i nisim nuntaknate ah aituam na khempeuh sung nangawn ah na thakte sem thei lai hi.

d) Piansakna thak a Pasion Kammal

Pasion in a kammal tungtawn in na khempeuh a omsak bangmah in, ama kammal tungtawn in a um khempeuhte tungah gupkhiat na tungsak hi. A taktak in Zeisu pen tua Kammal (Thu) hi. Gupkhiatna nasep lianpi pen Pasion in ama sung leh ama tungtawn in kicingsak hi (Jn. 1:1-14). Zeisu en in a thu i ngaih ciangin Pasion in amah tawh kisai hong theihsaknopte mu in za hihang (Jn. 14:9-11). I lungtang sungah Zeisu i muan nading upna a piangsak zong hih Pasion kammal vangliatna hi. Tua kammal lo in Pasion kiangah kihei ngei lo ding hihang (Rom. 10:17). Akammal Zeisu tungtawn a hong pai Khazih sung a upna tungtawn in nuntakna thak leh lungtang thak pen Pasion in hong pia hi (Psa. 51:10)

e) I nuntakna sungah Pasion Kammal

Pasion kammal bek pen piansakna khempeuh ah mihing lungtang sung dong a tum thei palai ahi hi (Heb. 4:12-13). Bangmah dangin mihing nuntakna leh kha khen thei lo hi. Pasion kammal in i nuntakna sung hong lut ciang dong i kha pen nuntakna vangliatna nuai ah kisel in kiphumcip hi.

f. Kammal limte.

(i) Khuavak:

Pasion kammal in tansakna leh kilakna piangsak hi (Psa. 119:105). Hih in Zeisu thu thuman thutak pulak in thuman thutak in mite suaktasak hi (John 8:31-32). I nuntakna sunga lamlahna leh makaihna a tungsak zong Pasion kammal hi (John 8:12)

- (ii) **Tui:** Tui in sawpsiangna piangsaka, i nuntakna ah Pasion kammal in ahi bang lampi in gamta hi. Tua kammal ah kihong in nungta in eite hong to dingin i phal leh, Pasion hong deih bang mi siangthote ahi dingin tua in a vangliatna tungtawn in hong khel ding hi (Eph. 5:25-27).
- (iii) **Khaici:** Khaici vawhpa thugentehna ah (Luk. 8:4-15). Khaici pen Pasion kammal hi a, (Luk. 8:11). tua thugentehna a deihna pen tua thu a za leh a sangte nuntakna ah khantohna leh gahphatna tunsak ding ahi hi (Luk. 8:15)
- (vi) **Mei leh Sek:** Pasion kammal pen a kisas ahih leh a khauh mahmah kammal hi thei hi (Jer.23:29). Pasion pen dai tak leh damdam in pau ngei lo a, (1Kings 19:11-13 Av). tua sangsik in sek leh mei bang in pau thei hi. Tua pen i tup thuman loh na leh i lungtang khauh hang ahi hi. Mei in kaang in sek in sukham hi. Eite khempeuh in Pasion kammal tawh sukkhapna leh sian sak na kisas hihang.
- (v) **Khuaizu:** I Pa in a kitam in hong nusia ngei lo a, hong damsak nading leh hong kicin sak nading in hong sukham hi zaw hi (Psa. 19:7-11). Khuai zu pen cidamnading hi. Hih pen a kha pan a khum, natna pan damna a piangsak a dik a maan zatui hi. Pasion kammal pen eite ading damna hi a, i kha leh i nuntaknate damsak hi. Pasion thahatna leh vangliatna kammal tawh a nungta mikhat in ama nuntakna sungah kha kicin'na leh Pasion nopna khumnate muding hi (Psa. 119:103)

g) **Kammal Vangliatna**

Pasion kammal in a vangliatna ama sung mah ah a pua, sunglam vangliatna nei hi. Hih pen Pasion awging ahihman ahi hi. Hih pen Pasion hu hi a, hong pai khiat ciangin Pasion mahmah ii lungtang pan hong paikhia hi. Hih in Pasion vangliatna pua in Pasion ngimna tangtungsak hi.

h) **Pasion in mite tungah thu a genna a thupizaw pawlkhat**

- (i) **Piansakna ah ama Kammal:** Khua vannuai in Pasion kammal tawh ama hihna nei a, hih piansak vaihawmna mahmah in Pasion pianzia lah khiatna khat ahi hi. Tua bang tawh Pasion kammal tawh a kipiangsak khat pen ahih na ciang khat tawh Pasion kammal luan zawi khat suak hi (Psa. 19:1-6). Pasion thumaanna mai ah mihingin paulap nei lo hi (Rom. 1:20).
- (ii) **Mailamthu genkhohlna tungtawn a amaKammal:** Pasion in kamsang khat zawi tungtawn in ama kammal gen thei zel hi. Hih bangzia in kammal a kigen sim in tang gen in, tona tawh hia, a za a ngaite lampan thuhkik nading gamtat nading sawl hi (2Pet. 1:20-21; Matt. 10:41).
- (iii) **Zeisu sung ama Kammal:** Zeisu pen kammal, thu hi (John 1:14). Zeisu sung a kipulak pen sang a, Pasion lungtang pan a hong pai a kitezaw kammal om lo ding hi. Hih pen Pasion kammal kician sitset hi in, eite thu, leitung thu, kiim leh paam genna kammal hilo in, ama thu mahmah hi. Ama Tapa sungah Pasion in eite tung a hong gennop KHEMPEUH hong pulak khin hi. Hih pen Pasion kipulakna KAMMAL (THE WORD). hi (Heb. 1:1-2).
- (iv) **Thuhilhna tungtawn a ama Kammal:** Pasion deihna pen ama kammal hihna genna tawh kistem theilo hi. Pasion in ama kammal tangkona tungtawn in mihing pasal leh numeite a ki gupkhiat nading in vaihawm khin hi (1Cor. 1:21). Eite


mawhpukna pen Pasion in Zeisu sungah eite hong piak leh ama Khasiangtho tungtawn a hong piak tua kammal tangko nading a a hoih lampi khat peuhpeuh zon ding ahi hi (Rom 10:14-15)

(v) **Khasiangtho tungtawn a ama Kammal:** Hih theihna lampi khempeuh tawh Pasion in thu a gen pen Khasiangtho tungtawn hi. A hizong in tua sanga a tang leh a kicianzaw kizopna pawlkhat Laisiangtho sungah kilak a, gentehna in Samuel (1Sam. 3:10-14). Nungzuite nasepnate zong Pasion in ama nasepnte tungah a kiza theiawging, mang tungtawn, kamsanna, limite leh nalamdangte tawh tangtak-a a gen na gentehnte tawh kidim hi. Hih gentehnte in Pentecost ni a Khasiangtho kibuakna leh tua meizom a Khasiangtho letsongte a kingahna langkhasak hi.

(vi) **Laisiangtho sunga ama Kammal:** Laisiangtho khempeuh pen Pasion kammal hi. Laisiangtho sungah lungmuang tak in nei thei hihang. Adang hihtheihna tampi tuamtuan tawh Pasion thungenna pen Laisiangtho in teci pang a, ahizong in Christiante nuntakna leh khantohna ah Laisiangtho in a tuam vilvel in na sem hi. "Laisiangtho khempeuh Pasion humuap hi a, thuhilh nading, tai nading, bawl phat nading, thumanna lam a pattah nading in phatuam in manpha hi. Tua in Pasion mipa pen na hoih khempeuh sem dingin kimtaka a mansa a om theih nading ahi hi." (2Tim. 3:16-17). Laisiangtho in upna ah eite hong thahat sak in lametna ah hong hanthawn hi (Rom. 15:4). Khasiangtho in Laisiangtho sungah thu gen khin ahihna leh Laisiangtho tungtawn in hong hopih lai ding kisas ahihna thu a kipeh lam i muh theih ding thupi hi. Hih Pasion Khasiangtho in a sep nasep nam nih pen in Pasion hong piaksa thupen tu ni a eite ading Pasion kammal ahihna hong khamuan hi. Hih pen hohtak phatak a kantel sittelna tawh eite in i khen sat ding nasep hilo in, Khasiangtho nasepna ah kihonna tawh hizaw hi.

i) Laisiangtho sunga Pasion Kammal

Laisiangtho cih bek sang in Pasion kammal cih ngaihsutna pen zai zaw hi. Hih pen lim tuamtuan tampi tawh Pasion kammal tang a ding a kual vilvial khat ngaihsun leng kimu theizaw lai hi.



Hih lim bem vilvel sungah Laisiangtho sunga Pasion Kammal kihel hi. Adang Pasion in thu hong genna lam pi khempeuh in Laisiangtho sungah hong tun hi. Laisiangtho tungah

i kihonna in zong Pasion in eite tungah thu hong genna lampi dang hong pulak hi. Laisiangtho sunga Pasion kammal in a dang kammalte pan a kituam khenkhia lamdanna khat nei hi. Apianzia pen kho zaw hi. Adang kammalte khempeuh thu a khen thei ding dinmun leh lamlahna laigil a piangsak 'Piakkhiat na' limkhat Laisiangtho ah om hi. Pasion in Laisiangtho sunga a koih pulakna pan behlap theih leh lak khat theih kammal dang leh thudang pen Laisiangtho sang in a dang khat peuh in a neih theih zawkna thumaan i tel ding kisam hi. Gentehna in kamsanna in Laisiangtho tungah kituak zaw aih keh Laisiangtho i tangtunsak theih nading lamlahna hong tun thei hi. Ahizong in hih pen thu zuih thak leh upna thak ading in bulphuh ding hilo ding hi.

j) Laisiangtho Nasep

(i) Bulphuhna (Focus)

Laisiangtho in eite khatciat nuntakna ah Pasion neih a kician bulphuh kician kammal laigil hong puak a, tua pen Zeisu hi (Jn. 5:39).

(ii) A pianzia (Character)

Laisiangtho in thu a gen Pasion omzia, pianzia khat a kilangtang in hong pulak hi. Pasion in a mite a bawlzia laising tho sung a kiciam teh tungtawn in Pasion lungtang mu thei hang a, amau te tungah Pasion in thu a gen bang in Pasion tung a mite thuh kikna mu thei hihang.

(iii) Gencianna (Definition)

Laisiangtho sunga a kilang pulakna tungtawn in i nisim nuntakna ah i zat pah theih ding etteh ding te, thuhilhna, thuzuih bulpi leh sunglam muhnate hong pia a, tuate pen kammal ading gencianna hong pia hi. Laisiang tho a diak diak in thuciam thak in dinmun khat peuh leh thu khat peuh ading in a kizangh pah thei ding nuntakna ading thubulpite hong phahsak hi.

(vi) A kiciatna (Charity)

I mimal tuahkhak thu ah i zawh loh theih Laisiangtho tungtawn a Pasiang kammal tawh kisai thutang khat om thei hi. Kiciat sitsetlna pen telcian nading lampi hi.

(v) Khentel siamna (Discernment)

Laisiangtho pen pilna naak bek hilo in pilna hi. Khasiangtho humuapna nasep tungtawn in Laisiangtho in vangliatna lian nei hi. Khasiangtho vangliatna sungah a gen bang in eite ading hong suak hi. Pasion kiang pan kammal dangte khempeuh i khentat nading in tua pilna kisam hihang. Pil na ahi, Laisiangthote sungah i nuntak leh khentatna ah eite mipil suak ding hihang.

k) Kammal sungah Nuntakna

Pasion kammal sungah pai in i tel nading in Khasiangtho i kihuh sak ding kilawm hi. Ci-le-sa lungsim in Pasion kammal tel lo ding a, ahizong in Khasiangtho in tel in eite thuman thutak hong lak in Khazih lungsim hong pia ding hi.

James 1:19-25 sim in. Pasion kammal thumanna pen khantohna leh gahgah na ding tawh tang hi a, upna nuntakna ah a thupi bel thu bulpi ahi hi. Eite in a genbangin dawnkik leh a deihna kicingah i kalsuan nading in Pasion in eite hong hopih hi. Hih thu ah thumanna in thaman lian hong pia hi. Pasion kammal pen eite limlang hih tuak hi. Tua limlang i et ciang in ei le ei kimu bek lo in, Pasion kammal khuavak sungah muding hihang. Hih in

Khasiangtho vangliatna sungah eite hong khel ding hi. Hih James thugenna sungah laigual thum, thubulpi thum om hi.

(i) **Lungluttak a etnate**

Hih lai gual in eite tunga Pasion hong gen kammal kinga i lungsim puak gen in, tua kammal thupisim tak a, a la leh a ngah banglian-a a kibawl mipa khat gen hi.

1. **I Lungsim puak namthumte pen:**

- *Khensatna lungsimpuak*, Hih pen i utna tawh kisai hi in, Pasion in eite hong hoipih nading mun i pia masa diam cihleh, Pasion kammal i dawngkik diam dawngkik kei diam cihte hi. Pasion in eite khat ciat hong hopih nuam a, Pasion kammal i ciapna i khantoh leh khensatna in lamet kholhna na suaksak ding hi.
- *Upna lungsim puak*, Pasion kiang pan a tamzak pente pen Pasion kiang pan zak ding a lamem pente hi.
- *Cihetakna lungsim puak*, Pasion kiangpan i zakte thupitak in la in, i tuahkhak thu ah zat pah ding kisam hi.

2. **Pasion in hong hopihna ding mun i bawl ding kisam hi.**

Hi lai ah hite kihel hi.:-

- *Lungsim kisak kholhna*, Topa tawh hudikkhopna ding mun kisam ahihman in gamdaihna leh phatnate hi lai ah kizang thei hi.
- *Ngaihsutna kisak kholhna*; I ngaihsut leh thu i nget ahi na khatpeuh i ngaihsutna sungah i neih ding hoih hi. Adiak in Laisiangtho hi a, hong halhsak in lamlahna hong pia hi.
- *Nuntakna kisakkholhna*. Hi lai ah, hun a om theih nading in, nanglenang na kileptuah ding cihna hi. Pasion i zon ciangin hong thahat sak in tha hong pia ding hi (Isa. 40:31)

3. **Pasion hong gente thupitak a i lak ding kisam hi.**

Pasion i ngak suak leh i zaksa bangbang khensat theihna thupiang meetlawh ding hihang. Athupi lakpan thupilo thuneute in khiat ding kisam a, ahizong in Laisiangtho lungngaih ding i sim leh i ngaihsutna in khanna ngah zaw ding hi. Pasion kha kiang pan hong pai pen a kitezaw in khentel thei ding hang. Pasion in nang tungah bang hong gen cih ciaptehna in hong phatuamsak a, tua hi leh ciamteh thei in tua ah pai kik in a nungciang zaisak zaw thei hi teh. Pasion hong gen pen mannei tak a letcipna zong thupi a, thu na gen khiat ma in na nuntakna khenkhat a koihna ding in na kipsak ding kisam hi. I zak kammal khempeuh i sittel tawntung ding ahi hi.

Na sunga Khasiangtho tawh teci a pangkhawm hiam. Pasion kammal dangte tawh a kituak mah hiam? Tua kammal nung a zui thute zong i nuntakna ah i pholak ding, kilat khiatsak ding kisam hi. Khat veivei i nuntakna ah Pasion kammal a tangtunna i muh nading i kalsuan ding pawl khat om hi.

(ii) **Zepzom ding**

Thumanna pen khantoh na ding tawhtang hi; I nuntakna ah tua kammal in na hong sep ma in i sep ding kisam hi.

1. **Tua Kammal pulakna tawh**

I lungsim lawnna (Feeling). a hihnopna nuai ah, aih keileh, kiim leh paam om ziate thuneihna tawh kileh bulh na nuai ah, aih keileh ci le sa hiam Satan

vangliatna nuai ah. nuntak nading teel theihna maan bang in Pasion in a kammal hong pai hi. Upna tawh i nuntak na ah, hih a leh lam ngaihsutna, lungsim lawpna, kiim leh paam omziate i pulak nading leh, Pasion hong piak kammal la in, tua pen i upna pulak nading zong ding cih teel nate a tawntung in phukha hihang. Hih pen Laisiangtho a thupi mahmahna munkeek ahi hi. Tuate pen upna kammal lompi tawh kidim hi. Tuatae in ei le ei a bang sem ding cih i ngaihsutna pan Khazih Zeisu sung a ei le ei i kilamdan na lim ah hong koih hi. Tuate in Khasiangtho vangliatna tungtawn in cidamna leh thahatna kamciamte hong puak hi. Tuate khempeuh ban ah, i pulak nading tawh hong tawm kammalte hong pia hi. Upna i lahkhiat ding haksa i sak hun nangawn in, Laisiangtho kammalte la in eite pulakna suaksak thei hihang. Tua kammal pulakna gah pen i nuntakna ah vanglian mahmah thei hi. Hih in lungsim thaksuah sak na, i lungtang siansuah na, i leii i kepna leh i tuah khak thu te mai ah upnate hong puak hi.

2. Tua kammal sinna tawh

Laisiangtho thudonloh na in kha thu thudonlohna ah hong tun hi (2Tim. 2:15). A nuntakna ah Pasion hopihna a za nuam mahmah mi khat in, Laisiangtho pan a kipat ding kisam hi. Banghang hiam cihleh hih pen eite ading a kitelpen kilakna ahi hi.

3. Tua Pasion kammal zatpahna tawh

I nuntakna ading Pasion lamlahna thupi pen Laisiangtho sungah hong kipia zo hi. Hih a kipulak thumante i zat pah ding kisam hi. A dang hih theihna khatpeuh pan a hong pai Pasion kammalte nangawn i zatpah ding kisam hi. Khasiangtho in Pasion kiang pan kiteltak a, khensat theihna ah hong tunpih ahihman in Khasiangtho thu i man ding kisam hi. I nuntakna ah Pasion kammal zatpah ding i sinna tawh bang pen maan in bang pen maan lo cih kitheikhia pah hi.

4. Tua kammal hawm khiat na tawh

Pasion kammal pen ei le ei in thupitak a i lak mateng in midangte nuntakna ah kihawmkhia thei lo hi. Hih pen kammal sepna maan khat hi (John 8:31-32). Zeisu ading nungzuite i bawlnop leh ei le ei mahmah nungzuite i kisuahsak masak ding kisam hi. Midangte i suahtak sak nop leh ei le ei Zeisu sungah kisuaktasak masa ding hihang.

(iii) Thupha ngah in

Alian mahmah thuphate pen Pasion kammal sung a nuntakna pan gahkhia tawntung hi (Psa. 1:1-3). Kammal sungah i nuntak teh tua kammal pen a gen bang hong suak hi. A hang bel Pasion kammal i hawm ciangin tua kammal sunga om na khempeuh a hawm i hi hi (Isa. 55:10-11). I sung a Pasion kammal in ei ading Pasion ngimnate tangtun ding hihang. Tua pen tua kammal thu mang in tua tawh i nuntak leh piang ding hi. Pasion kammal pen vanglian ahihman in Pasion vangliatna hawm ding hihang. Pasion kammal pen lametna tawh kidim in, upna tawh nungta in i mawhloh nading gupkhiatna hong puak ahihman in Pasion kammal kamciam sungah i hawmkhawm ding hi. Pasion kammal sunga nuntakna hanga thupha i gahte nga pen:-

- Picinna ah i kha nosuahsakna
- Khentel theihna ah kha pilna
- Pasion theihna ah khantohna, tuate pen, ama deihna, lampi nasep leh kammal
- I nuntakna sungah Khasiangtho vangliatna khantohna (Khasiangtho a luangkhasak ding hong puak nuntakna a pia Pasion kammal khauhual i nuntakna sungah i lamh ding kisam hi.
- Nansepna ah gah phatna.

l) Dotnate leh kikup khopnate

1. Pasion kammal a lawhsam ngei hiam? A lawhsap ngei leh Pasion piansak na a om lai ding hiam? A nungta ding hiam?
2. Hih laihihna sungah Pasion kammal lim nga om hi. Pasion in tuate khat peuh maw a vek pi tawh maw hong hopih khin zo hiam? Kam kum in.
3. Na nuntakna ah Pasion kammal in a muibut nading na phal hiam? Tua ading mun pia in Pasion hong sawl bangin na dawng kik hiam?
4. Upkhialhna om lo a, i up ding leh i muan theihna ding dinmun bulpi kician ahi dingin Laisiangtho i kisam hiam?
5. Khasiangtho huhna lo tawh Pasion kammal telthei in i sim thei haim?
6. Laisiangtho pen Pasion humuap ahih leh (2Tim. 3:16). i pianken lungsim tawh kantel in a sunga thuman thutakte i ngah thei ding hiam?
7. Bangci bangin Pasion kammal in a gen bangin eite ading hong piang thei haim?

m) Tomlakna leh Zatpahna

1. Pasion kammal pen vanglian hi. Pasion in thu khatpeuh a genteh piang pah hi.
2. Pasion kammal in ama sung amahmah ah vangliatna pua hi.
3. Zeisu pen Pasion kammal hi a, amah pen Pasion in eite tunga hong pulak nop khempeuh lahkhiatna hi.
4. Laisiangtho khempeuh Pasion kammal hi-a, Pasion tang hi. Tua pen eite tungah kitehna ciang ding leh i zak Pasion kammal bangte i tehtheih nading in Khasiangtho in hong muap ciangin, Pasion in zangh hi.
5. I nuntakna Pasion kammal tungah i piak ding kisam a, Khasiangtho tawh eite nuntakna ah thu hong gen ding i phal ding kisam hi.
6. Pasion kammal i zak ciangin Khasiangtho hong sawl bangin i dawnkik ding kisam hi. Thumanna pen khantohna ding tawhtang hi.
7. Khasiangtho theihsakna tawh sinna nei in Pasion kammal i theih ding kisam hi.
8. Pasion kammal sungah i nuntak ding kisam hi. Banghang hiam cihleh, tua thu i man leh Pasion in eite ading hong ngimsakna eite sungah tua kammal in hong tangtungsak ding hi.